

La azions del Comun General de Fascia

Fora per l'an 2021 l'è stat portà inant n muie de scomenzadives, ence a livel legislatif, per ge dèr maor recognosciment al ent soracomunal fascian recognosciù da la legislazion

Ai 8 de jujn l'Consei provinzièl de Trent aproa n provediment che era stat domanà amò del 2020, canche ai 23 de november l'procurador Giuseppe Detomas ge aea consegnà al president del Consei provinzièl Walter Kaswalder na petizion domanan che l'Comun General de Fascia vegne recognosciù e disciplinà da la PAT dò l'recognosciment costituzionèl, scomenzan col peverder la prejenza de derit del Procurador anter i componenc del Consei de la Autonomies. Jà enlouta l'conseier provinzièl ladin Luca Guglielmi, col dessegn de lege nr 79, aea formalisà la domana per ge arseguir al Comun General la raprejentanza tel CAL che à dapò troà l'sostegn de duc i schieramenc politics.

Na gestion coordinèda di vièi da mont

L'Comun General, i Comuns, la Frazions, l'APT e la SAT à metù ensema n projet de val per na gestion coordinèda e percacenta di vièi, per la jent, per l'ambient e per l'turism. La cordanza de colaborazion, che à inom «Projet de sistem per la valorisazion di troes de Fascia» vegn aproèda ai prumes de messèl e l'è l'frut de n lurier portà inant da meisc anter la istituzions fascènes, en particolèr per l'Comun General de Fascia dal conseier de procura Giorgio Dorich e per l'Azienda de Promozion Turistica dai responsaboi de l'area de prodot.

Smaorament di servijes linguistics

L'prum articol de la lege regionèla nr 5 dai 27 de messèl, la lege de assestament del bilanz de previjion de la Region Trentin Sudtirol per i egn 2021/2023, à desche destinatarie l'Comun General de Fascia. Con chest articol vegn aproà n contribut regionèl de 170.000 euro al an al CGF per la maor speises per l'atuazion de la despozisions su la दौरa del lengaz ladin, che perveit che l'ent soracomunal fascian fae



L'conseier provinzièl Luca Guglielmi e l'procurador Giuseppe Detomas.

servije de traduzion ence per i Comuns e la istituzions publiches de Fascia, de la Provinzia e de la Region. Con chest finanziamenti pel donca vegnir smaorà la dotazion de organich di Servijes linguistics e culturai del Comun General.

A Majon per sostegnir noscia economia

Per didèr e sostegnir l'economia de Fascia l'Comun General met a jir l'projet A Majon che perveit na lingia de intervenc per creèr n «sistem» de sostegn del compart economic. La azion à l'obietif de smaorèr la colaborazion anter la firmes del comèr e i profesionisè de val, sensibilisèr la jent a comprèr su territorie, e responder a besegnes concrec desche ge tegnir pòz a la concorenza del web ge dajan l'met a comèrziand e profesionisè de se fèr cognoscer on line su na piataforma sorida e fidabola. L'inom cernù vel recordèr n cognosciù brand internazional de comèr online, ma declinà per ladin «a cèsa», per portèr l'economia e i prodoc de val te la majons de Fascia e de chi che ge vel ben. L'projet è sparti te treì setores creè per sostegnir

i i exercizies comèrziài, la restorazion e i profesionisè, travers campaigns video, audio, social e grafiches de sensibilisazion su l'importanza de sostegnir l'economia de la val. Dapò l'è l'idea de creèr n sito web e de fèr formazion per proèr a creèr duc adum n vero e-commerce local.

Del 2021 l'è stat endrezà scontrèdes coi assessores di Comuns e coi raprejentanc de la categories enteressèdes e metù fora n video de promozion e l'è intenzion de jir inant con corsc per l'personal di restoranc e de la boteighes, per miorèr la tecniches del comèr e la vida de se raportèr col client, e fèr mingol de formazion ence su ambient, tradizions, cultura e lengaz de Fascia, acioche l'personal posse saer ge dir al ghest vèlch de noscia realtà.

Fascia vel l'10% de la steora de sojornanza

Se aea tacà a n rejonèr jà da temp: i scioldi che vegn ite da la steora de sojornanza te Fascia i cogn poder servir per scomenzadives de utol per miorèr la calità e la perferida del turism te val.



Na sentèda del Consei General del Comun General de Fascia del 2021.

A la metà de otober l'Consei General del CGF aproa dut a una na mozion per fèr n dessegn de lege che ge domane a la Provinzia de ge assegnèr al Comun General de Fascia l'10% de chel che vegn regoet te val da chesta steora per poder finanzièr e sostegnir intervenc de valuta culturèla, de recuperament de elemenc carateristics e projec de enteres generèl che califichèe l'territorie e l'identità de la comunità ladina e che valorisee la perferida turistica. Sun chest provediment, che à l'aproazion ence del Consei de Procura e del Consei di Ombolc, se disc a una duc treì i capigrop del Consei e l'vegn aproà da duc i conseieres. Se trata de n provediment emportant ajache l'Comun General l'è n ent autonom recognosciù a livel costituzionèl ma no l'è a autonomia finanziaria.

«Con chest dessegn de lege Fascia domana de poder aer n ruol emportant tel setor turistic caraterisà da l'identità ladina – disc l'procurador Giuseppe Detomas – ma cogn vardar che i ne dae ence le resorse per l'far. L'è n strument de prescion politica envers la Provinzia che vegn ence dai ombolc e dal conseier

provinzial Luca Guglielmi che à fat saer de aer prejentà te Consei provinzièl na proponeta valiva, l'ddl nr 118/XVI. L'ejit de chesta scomenzadiva darà la mesura de cotant che vegn tegnù en consci drazion Fascia e l'conseier ladin.»

Te n auter Consei General a la fin de november l'Procurador fèsc a saer de ge aer domanà, tant al conseier Guglielmi che al president Fugatti, de peverder chest 10% al CGF te la lege de assestament al bilanz de fin de an, per poder portèr a compiment l'iter a na vida più asvelta e segura e Guglielmi conferma sia intenzion de portèr dant n emendament sun chest.

Ampò te la discusscion de la finanziaela Guglielmi, senza rejonèr con l'Comun General, l'tol de return l'emendament ajache da oujes informales somea che l'APT no la sie deldut a una. Chest soscedea l'permèl del Procurador e ence de etres componenc del Consei General, che te l'ultima scontrèda di 28 de december i domana ite l'conseier ge deschiarese al Consei General percheche no l'è portà inant l'emendament domanà da duc a una, descheche l'aea emprometù.